


## TORITENY - ALAHADY faha-28 TSOTRA - TAONA D



*“Mitsangàna, ary mandehàna, fa ny finoanao no nahavonjy anao”.*

Ry Kristianina havana ao anatin’ny volana oktobra izay ibanjinantsika manokana ny maha-misionera antsika sy ny maha-iraka antsika isika. Vita batemy aho ka irahina ho vavolombelona eo anivon’ny mpiara-belona. Ny volana oktobra no ibanjinantsika koa amin’ny alalan’ny fanaovana ny raozery ny misterin’ny famonjena antsika iarahana amin’i Masina Maria. Izany no maha-misionera antsika, manorina EOY sy ETA ka manitatra ny fanjakan’Andriamanitra amin’ny alalan’ny fitoriana ny Vaovao mahafaly izay mahatonga antsika Kristianina, ho Kristy mpiara-belona amin’ireo manodidina antsika ka ho génération mpanorina. Ao anatin’izany indrindra isika no manomana akaiky dia akaiky ny

fankalazana ny Sinaody faha-7 tapany voalohany : EGLIZY OLO VELOMIN’NY BATEMY, MIARA-DIA, MIOMBONA, MANDRAY AN-TANANA IRAHINA HO TABERNAKLA VELONA. Amin’izao tapany voalohany izao indrindra dia mifantoka amin’ny Fianakaviana Eglizy kely miara-mivavaka mandalina ny finoana isika. Raha nahatsikaritra isika dia

**Vakiteny I : 2 Mpanj. 5, 14-17**

**Salamo : Sal. 97**

**Vakiteny II : 2 Tim. 2, 8-13**

**Evanjely : Lk. 17, 11-19**

mifanojo amin’izany ireo lohahevitra naroson’ny Eglizy. Tsy misy tokoa ny kisendrasendra hoy isika fa ataon’Andriamanitra izay hahasoa an’izay tiany. Tiany isika ka omeny torolalana mazava amin’izao ady sady dia mitondra antsika amin’ny fankalazana ny Sinaody izao. Mahereza àry isika amin’ny ady

amin'ny ratsy mety misakana ny dia hitondra antsika hamaritra ireo torolalana pastoraly "Directoire Pastoral" mikasika ny vavaka sy fandalinam-pinoana, ny katesizy sy fanabeazana.

Ny vakiteny amin'izao Alahady faha-28 tsotra mandavantaona izao dia mampahatsiahy antsika fa ny finoana dia ampifanarahana amin'ny fiainana andavanandro.

Ireo vakiteny telo dia milaza amintsika fa fanomezan'Andriamanitra ny finoana ary mila ezaka avy amintsika ny fandraisana io fanomezana io ka ny fiainantsika azy no mampiseho fa velona ny finoana. Tena zava-dehibe ny ezaka ataontsika satria io no hanehoantsika fa eo anivontsika Andriamanitra. Raha manao ny asan'Andriamanitra isika dia Andriamanitra manao ny asantsika.

Voalaza izany ao amin'ny Vakiteny voalohany, boky faharoan'ny Mpanjaka, mitantara an'i Naamana izay tratry ny aretin-koditra, ny habokana ka nahatonga azy niasalasa raha voairaky ny mpaminany izy hiditra impito ao anatin'ny rano, niasalasa izy nefa rehefa nanantanteraka izy dia niova ny vatany, niova ny hodiny, tahaka ny hoditry ny zazakely. *"Tamin'izany andro izany, i Naamàna sirianina niditra ka nisitrika impito tao Jordany araky ny tenin'i Elisea olon'Andriamanitra, ary tonga toy ny nofon-jazakely indray ny nofony ka nadio izy"*.

Andeha hiveranantsika ny Evanjely. Tsara ny manaraka eto fa folo ireo marary no nositrarin'i Jesoa nefa anankiray ihany no niverina nahatsiaro an'Andriamanitra. Ny tian'ireo vakiteny asongadina, ho fampianarana fototra dia ny maha-iraka antsika ka hirosoantsika lalindalina kokoa amin'ny maha EOY antsika, Eglizy Olo Velomin'ny Batemy mandray an-tanana miombona irahina ho Tabernakla velona. Voalaza amin'ny Evanjely fa folo no sitrana fa iray no niverina nisaotra an'i Jesoa. Mahaiza isika mankasitraka amin'ireo fahasoavana omen'Andriamanitra antsika ireo.

Fampianarana telo no tiako hifampizarana amintsika :

Ny voalohany, hita fa voasedra tokoa ny finoan'i Naamana ary zavatra tsy nampoiziny no niangaviana azy. Matetika koa isika dia tahaka izany eo amin'ny fiainantsika andavanandro, misy zavatra tsotra iangavian'Andriamanitra antsika nefa heverintsika ho tsinona izany ka mikatsaka zavatra sarotra isika fa indrindra tato ho ato. Iza tokoa no tsy mihaikaiky sy mitaraina ?. Ireo boka folo lahy nifanena tamin'i Jesoa fa indrindra ilay vahiny dia nolazain'i Jesoa hoe mandehana ianareo manao fankasitrahana fa tanteraka aminareo izay nirinareo. Raha maharitra amin'ny finoana isika, raha ivelomantsika ny finoana, raha matoky ny famindram-pon'Andriamanitra sy ny famonjeny isika, dia miova ny fiainantsika.

Matoa tsy miova ny fiainantsika dia satria tsy matoky an'Andriamanitra isika, ary tsy matoky ny Sakramenta nomen'ny Eglizy antsika. Matetika isika mivezivezy etsy sy eroa mitady Andriamanin-kafa. Maro ny habokana mikiky antsika amin'izao andro iainantsika izao, maro ny mamparary, maro ny aretina amin'ny fiainantsika, marary ny fiaraha-monina misy antsika ka mila mikatsaka bebe kokoa ny fiombonana sy ny fiverenana amin'Andriamanitra isika, izany no voalazan'ny Evanjely *"Ary ny anankiray tamin'ireny, rehefa nahita fa sitrana izy, dia niverina ka nankalaza an'Andriamanitra tamin'ny feo mahery. Niankohoka tamin'ny tongotr'i Jesoa izy, dia nisaotra Azy"*. Raha te ho sitrana amin'ny aretina mikiky antsika isika dia aoka hiverina amin'Andriamanitra fa indrindra amin'ny maha

misionera antsika, vita batemy aho ka irahina, aoka isika hanampy ny olona hiverina amin'Andriamanitra. Ny Eglizy reny manoro antsika sy mampianatra antsika. Lehibe ny famindrampon'Andriamanitra. Ry kristianina havana, aoka àry hanatona ny famindrampon'Andriamanitra isika. Henoy ny tenin'Andriamanitra ary ampiharo amin'ny fiainantsika satria raha ampiharintsika tokoa ny tenin'Andriamanitra dia miova ny fiainantsika.

Ny faharoa dia fantaro fa folo ireo nositrinin'i Jesoa nefa iray ihany no nahatsiaro nankasitraka noho ny fahasoavana azony, isika koa ve mba mahatsiaro misaotra an'Andriamanitra?

Ilay vahiny tsy nahazo ny dikan'ny fahasoavana azony no niverina nisaotra sy niankohoka tamin'i Jesoa, Samaritana izy. Aoka isika hahay hankasitraka an'Andriamanitra fa indrindra amin'izao fiatrehantsika ny Sinaody izao. Tena vanim-potoana lehibe eto amin'ny diosezy izany. Ny tanjona dia hahatonga antsika ho Olondehibe amin'ny finoana afaka mameno ireo sajoa enina raha tadidintsika. Aoka isika hahatsiaro fa tian'andriamanitra isika. Raha dinihintsika ny zava-misy dia matetika lazaintsika fa tsy misy kisendrasendra fa nalamina'Andriamanitra ny zava-drehetra ho an'izay tiany. Izany no niseho tamin'ireo marary hoditra saingy anankiray ary vahiny no nahatsapa izany. Aza gaga isika raha tsy maro amintsika no mahatsapa ny famindrampon'Andriamanitra. Sambatra isika fa mahafantatra izany rehetra izany. Koa ny fankasitrahana tsara indrindra dia ny hiverenantsika amin'i Jesoa, miainga avy amin'i Jesoa ka hitondra ny Vaovao mahafaly amin'ny manodidina antsika. Maro ny mety ho fahasoavana voaraintsika amin'izao Sinaody izao. Aoka isika hahay handray ny tenin'Andriamanitra tahaka an'i Masina Maria ka hizara azy amin'ireo manodidina antsika indrindra amin'ny volan'ny raozery izao tahaka ny nizaran'i Masina Maria tamin'i Elizabeta rahavaviny. Ry Kristianina havana mila vavolombelona, mila misionera izao androntsika izao.

Ny fahatelo dia miainga amin'ny Vakiteny faharoa amin'izao Alahady faha-28 mandavantaona izao dia tsy inona fa ny taratasin'i Md Paoly ho an'i Timote. Efa Alahady maromaro isika no namaky ny taratasy ho an'i Timote, manafatra antsika i Md Paoly androany hanana faharetana eo amin'ny fiainantsika ny finoana. Nisy nanontany hoe : “ahoana ny hahafantarana fa velona ny finoana” ? Toetra anankiray azo amantarana na kriterana hahazana fa velona ny finoana dia ny faharetana ananantsika. Indrisy tsy toetra fahita loatra ankehitriny anefa izany. Havaozintsika izany amin'izao sinaody izao. Tsy misaraka amin'ny faharetana ny fanompoana izay voalazantsika tamin'ny Alahady lasa teo. Raha manana faharetana isika amin'izay rehetra ataontsika, amin'ny vavaka, amin'ny fandalinam-pinoana dia mahatonga antsika ho tena EOY katolika marina tokoa. Finoana mifototra amin'ny tena marina no iainantsika, mila faharetana ihany koa ny maha-katolika antsika, isika mirotsaka amin'ny Fikambanana masina ihany koa dia hahafantarana ny finoana velona. Ampirihina isika hiditra amin'ny Fikambanana fa indrindra ny tanora. Matetika rehefa manao tatitra mandritra ny famangiana pastoraly dia hita fa tsy maharitra isika nefa mila faharetana ny finoana velona. Anisan'ireo torolalana pastôraly mila hamafisina ny hoe “rehefa amin'ny fotoana ianarana Kônfirmasiô dia tsy maintsy mifidy Fikambanana masina”...

Toy izany koa ny fikatrohana amin'ny vaomieran'asa isan-karazany. Toy izany koa ny fandraisana antànana ny eglizintsika, mba hitohy lalandava ao anatin'ny faharetana. Ny amin'ny fankalazana ataontsika koa, ny fandraisantsika ny sakramenta fa indrindra ny Eokaristia, mba hanana ny

faharetana isika. Araka ny fananarana ataon'i Md Paoly " *Raha miara-maty aminy isika, dia hiara-belona aminy koa; raha miaritra isika, dia hiara-manjaka aminy; raha mandà Azy isika, dia Izy koa handà antsika; raha mivadika isika, Izy tsy mivadika na oviana na oviana, fa tsy mahazo mandà ny Tenany Izy*". Mampahatsiaro antsika ny sasinkira fanaontsika amin'ny salamo faha-30 "*Fantatro ilay nametrahako ny fitokisako dia i Kristy ilay tsy mivadika mandrakizay*". Aoka isika ho vonona hanompo anatin'ny faharetana.

Ry Jesoa Tompo ô misaotra Anao tokoa izahay, tsy mitsahatra lanao manadio ny fo amampahinay mba ho masom-pinoana ny maso hijerenay ny manodidina anay ka hahatonga anay ho Kristy mpiara-belona eo amin'izy ireo. Ampio izahay hanana finoana velona hahafahanay hanompo, hampanjaka ny rariny sy ny hitsiny ao anatin'ny faharetana satria izany no ahazoanay ny tena famonjena ka hahatonga anay ho Eglizy Olona Velona hanitatra ny fanjakan'Andriamanitra manorina ny Eglizy Tranon'Andriamanitra ka ho zary génération mpanorina tokoa izahay. Lanao ry Jesoa no hanjaka amin'ny fiainanay mba ho ao aminay ny tena fiadanana ka hitondra fanantenana amin'ny manodidina anay tokoa izahay. Ampio izahay amin'izao Sinaody izao. Diovny izahay tahaka ireo marary hoditra nodiovinao. Izany hoe finoana vadio hirosoanay amin'ny départ vaovao no irinay hatao. Masina Maria Renin'ny Eglizy, tantano ny dianay mba hiara-dia tokoa, hiombona ka ho tody soa amantsara amin'ny Sinaody ka hihavao araky ny sitrak'Andriamanitra. Md Josefa mivavahà ho anay fa Ray Mpiaro ny Eglizy eran-tany ianao. Niaro ny dian'ny Fianakaviana Masina tamin'ny diany tany Ejipta ianao ka arovy ny dian'ny diosezy miroso amin'ny sinaody. Amen

Mompera Arseveka Mgr Benjamin Ramaroson